



JSL WALPROGRAMM

Gemengewalen 2017

JSL.lu
info@jssl.lu



Contenu

1. Eng Zukunft fir eis Jugend.....	2
2. Fir eng Stadentwécklung mat Wäitsiicht.....	3
3. Eng ekologesch Alternativ fir jiddereen	4
4. Besser Wunne fir eis all.....	5
5. Sport, Kultur an Ëmwelt an der Educatioun wäertschätzen.....	6
6. Lokal a regional Konzepter fir eis Gemengen	7
7. Fir eng Gemeng, déi verständlech an transparent ass.....	7
8. Zesummeliewen an eiser Gemeng.....	8
9. Gesond an eiser Gemeng	9
10. Eis Gemengen an Europa	10



1. Eng Zukunft fir eis Jugend

D'Zukunft vun enger Gemeng kann nëmmen ofgeséichert ginn wa se sech och ëm d'Wuelbefanne vun den zukünftege Generatioune këmmert. Kanner a Jugendlech brauchen an de Gemengen dat richtegt Ëmfeld fir kënnen opzewuessen an hir Fräizäit ze verbréngen. Spillplazen, Terrains multisports oder Skaterpistë si genau esou wichtig, wéi Jugendhaiser, déi och Hëllef ubidden fir verschidde Liewenslagen. Duerch den Asaz vu Streetworker kënnen Jonker erëm eng Perspektiv ugebuede kréien. An deem Kontext sollen och Gemengen de Jugendlechen ouni Aarbecht Plazen ubidden, déi hinnen et erméiglechen, an den Aarbechtsmarché eranzeklammen.

Et ass wichtig, Infrastrukturen auszebauen, fir dass jonk Kënschtler sech kreativ kënnen entfalten. Dat kann esouwuel iwuer Raimlechkeete fir Konschtausstellungen goen, wéi och Proufsäll fir Museksgruppen. Vun esou Infrastrukturen profitéieren net nëmmen déi Jonk, mee déi ganz Gemeng, well se doduerch kreativ Käpp unzitt a gläichzäitig de jonken Awunner Zougang zu neie Méiglechkeete fir déi perséinlech Entwécklung ubitt.

Fir datt Jonker kënnen fir d'Politik begeeschtert ginn, muss d'Iddi vun de Kanner- a Jugendgemengeréit ausgebaut ginn. Och d'Jugend- a Kannerkommissiounen mussen agebonne ginn. Primärschoulen an och Lycéeën mussen méi an d'associativ Liewen agebonne ginn, fir dass Kanner a Jonker mat Zäite sensibiliséiert ginn an och nei Méiglechkeeten entdecken, wéi se hir Fräizäit gestalten kënnen. D'Schoul ass net nëmmen do fir Wëssen ze vermëttelen, se soll och virwëtzeg maachen.

Jonker, déi a Familljen mat enger schwieriger finanzieller Situatioun liewen, dierfen op kee Fall aus dem Gemengeliewen ausgeschloss ginn. Geziilt Hëllef oder Subsidë fir jonk Leit aus engem sozial schwachen Ëmfeld déi sech méi engagéieren wëllen oder an engem Club matmaachen, droen dozou bäi, Exklusioun opgrond vun Aarmut entgéintzewierken. Wann e Kand net kann an enger Associatioun oder engem Club matmaachen, well d'Elteren net déi finanziell Mëttel hunn, fir Participatiouns- oder Aschreiwungsfraisen ze bezuelen (oder zousätzlech Käschtchen déi kënnen opkommen), dann entseet en Däiwelskrees. Keng Suen, keng Entfaltung. Ouni Entfaltung, keng Perspektiven.



2. Fir eng Stadentwécklung mat Wäitsiicht

De Bevëlkerungswuesstem zu Lëtzebuerg bréngt eng ganz Rei Defie mat sech, déi duerch eng intelligent an nohalteg Stadentwécklung musse geléist a bewältegt ginn. Dobäi kënn, dass de Beruffstrafic d'Stroosseninfrastrukturen extrem belaascht. Duerfir ass et wichtig, eng Transportpolitik mat Zukunft ëmzesetzen. Mir fuerdere méi Contournementë ronderëm Gemengen (mat spezielle Spuere fir Busser), den Ausbau vu verschidde „pôles économiques“ fir eng besser Verdeelung iwwert ganz Land, a vu *Park and Ride* Méiglechkeeten. Och Deplacementer bannent de Gemengen, besonnesch a gréissere Stied, mussen duerch en ëffentlechen Transport erméiglecht ginn, z.B. duerch Busser.

Mier wëlle keng Stied, wou de Beton d'Vue dominéiert. D'Gemengen hunn hei eng wichtig Obligatioun a sollten och duerch de Staat ënnerstëtzt ginn. Ëffentlech Parke mat Bänken erméiglechen et de Bierger, sech bei guddem Wieder och kënnen dobaussen opzehalen. D'Verdeelung vun de Parks sollt och intelligent geplangt ginn: amplaz ee risege Park am Zentrum, méi kleng Parke verdeelt iwwert d'Gemeng, esou dass jiddereen eppes dovun huet.

Kanner sollen op hirem Schoulwee net iwwer vill befuere Stroossen oder schlecht beliichten Zebrasträife goe mussen. Et kënne speziell Schoulweeër ugeluecht ginn, déi de Kanner déi gréisstméiglech Sécherheet ginn. Den Zesummeschloss vun Eltere soll duerch d'Gemeng ënnerstëtzt gi fir e Covoiturage an op d'Kanner op de Schoulweeër opzepassen.

Wichtig fir eng Stad ass e gesonde Wuesstem. Quartieren, déi ze staark gewuess sinn, sollte geschützt ginn, z.B. duerch en (temporäre) Verbuet vu weideren Appartementshaiser. E gesonde Wuesstem belaascht net nëmmen de Verkéier an d'Ëmwelt manner, mee léisst enger Gemeng och genuch Zäit, mam Ausbau vun Infrastrukturen op déi demographesch Entwécklung ze reagieren.

Zukunftsweisend ass och de Konzept vu *Smart City*. Duerch nei Technologië kënnen déi eenzel Servicer besser connectéiert ginn, de Bierger gëtt besser informéiert wat de Verbrauch vun de Ressourcen, Stroum a Waasser betrëfft, awer och d'Produktioun vun Offall. Smart Cities kënnen dozou bäidroen, dass Servicer méi geziilt an intelligent ugepasst ginn un d'Bedierfnisser vun de Bierger. Dat soll awer net an enger Philosophie geschéie fir e Maximum vu Käschten anzespueren, mee d'Liewensqualitéit vun de Bierger ze verbesseren.



3. Eng ekologesch Alternativ fir jiddereen

D'Ressourcen op eise Planéit si begrenzt, trotzdem konsuméiere mer wieder an ëmmer méi wéi wann et onendlech kënt weidergoen. D'Zukunft vun den nofolgende Generatiounen kann nëmmen duerch nei ekologesch Modeller geléngen. Gréisser Gemengen, oder en Zesummeschloss vu klengen Gemengen, kéinten hiren Stroom selwer produzéieren, sief et Solar- oder Wandenergie. Jee méi Stroom doriwwer produzéiert a benotzt gëtt, desto méi bëlleg gëtt et och – an se erreche mindestens déi selwecht Rentabilitéit wéi fossile Energien. A wa Gemengen hiren eegene Stroom produzéieren kéinten och just Bierger aus der Gemeng sech do als Aktionären akafen. Dëst verhënnert, dass multinationale Entrepreneuren ëmmer méi Muecht kréien an ëmmer méi eng Liberaliséierung vum Maart virundreiwen, déi sech bis elo nëmmen zum Nodeel vun der Bevëlkerung gestallt huet. Och den Ausstieg aus der Atomenergie kann doduerch erméiglecht ginn. Wichtig ass et dann och, dass de Staat hei e passende legislative Kader schafft. Et kënt een och en neie Modell fir Waassertaxen aféieren, mat engem Barème. Waasser ass e Grondbesoin vun all Mënsch, a sollt dowéinst bis zu engem gewëssene Volume gratis sinn. Mee wann een ze vill verschwëndt, sollt een och deementspreechend bezuelen.

Den Ausbau vum ëffentlechen Transport ass extrem wichtig. Et muss en nationaalt Konzept hier, dat déi eenzel Gemenge berécksichtigt, an och gréisser Stied aus dem Land besser verbënnt. Virun allem déi nördlech Gemenge mussen besser un de Süden ugeboune ginn, besonnesch an enger Zäit, wou op Belval ëmmer méi Leit schaffen a studéieren kommen. Konzepter wéi Monorail iwwert d'Autobunn, oder den Ausbau vun engem Autobunnrank ronderëm der Stad kéinten a Betruecht gezu ginn, a wärend sécherlech eng sënnavoll Ergänzung, ginn awer bei wäitem net duer. De multimodale Transport ass an deem Sënn wichtig. Velosweeër mussen ausgebaut ginn, besonnesch tëschent Nopeschgemengen a fir méi kuerz Distanzen. Déi Velosweeër sollten och intelligent un aneren Transportméiglechkeeten ugeboune sinn (Zuch, Bus, Tram). Konzepter wéi de „Vel’oh“ sollten an nach méi Gemengen ausgebaut ginn, an och hei mussen Gemengen zesummeschaffen, esou dass net all Gemeng säin eegent System huet. Den ëffentlechen Transport sollt och selwer mat Hëllef vun erneuerbaren Energie funktionéieren, wéi z.B. Elektrobussen. *Park and Rides* op de Grenze bei de Garë sollten och duerfir suergen, dass Parkplaz bei méi klengen Garen net iwwerfüllt sinn, an doduerch net méi vun de lokale Bierger kënnen profitéiert gi – wéi et elo scho verstärkt a ville Gemengen no un de Grenzen ass.

Well d'Stied ëmmer méi Plaz anhuelen duerch de Wuesstem, muss Zersiiedlung onbedéngt ageschränkt ginn. Gläichzäiteg muss ënnerhalb vun de Stied och nei Konzepter ausprobéiert ginn, wéi den „Urban Gardening“. Applaz alles zouzepléischen an ze betonéieren, kéinte Plaz geschafe gi, wou Leit eppes upflanzen an och selwer plécke kënnen. Dëst sollt z.B. duerch eng lokal Associatioun geréiert ginn. Och kooperativ Agrarbetreiber kéinten e Modell sinn.



4. Besser Wunne fir eis all

Soziale Wunnensbau soll weider ausgebaut ginn, dëst am Kader vun enger enker Zesummenaarbecht tëschent dem Staat, de Gemengen a private Promoteuren. D'SNHBM souwéi de Fonds du Logement mussen méi finanziell Ënnerstëtzung kréien, fir zu raisonnabele Präisser Wunnenge bauen ze kënnen.

De Bauperimeter muss erweidert ginn an de Staat eng Prioritéit ob der Acquisitioun vu privaten Terraine kréie fir se u privat Promoteuren, de Fonds de Logement oder d'SNHBM ze delegéieren, an engem kloere Kader. A ville Gemengen ass de Bauperimeter aktuell net ugepasst un d'Demande déi et fir Logementer gëtt, ouni dass doduerch onnéideg géif d'Ëmwelt geschiedegt ginn. Wa grouss Projete geplangt ginn, soll och d'Liewensqualitéit vun de Leit mat aberechent ginn. Mier wëlle keng Betonsstied an depriment Citéen, mee en Ëmfeld, wou d'Leit sech wuelfillen, wou Architektur sënnvoll agesat gëtt, fir e positivt Wunngefill ze schafen.

D'PAGE vun de Gemenge mussen ugepasst gi fir d'Schafe vun neie Wunnraim intelligent an effizient ze gestalten. Am Wunnensbau mussen nei Konzepter ugewannt ginn, z.B. den Asaz vu Materialien, déi nohalteg sinn, oder Wunnengen, déi et erméiglechen, d'Ëmwelt manner ze belaaschten, duerch e reduzéierten Energieverbrauch. Bauoplage mussen iwwerschafft ginn, domat engersäits Promoteuren un ekologesch an urbanistesche Critèrë gebonne ginn, gläichzäiteg awer d'Prozedure méi vereinfacht a kloer sinn.

Et muss awer op e Gläichgewicht geuecht ginn: entstinn ze vill nei Wunnengen op ze enkem Raum, bréngt dat Nodeeler fir d'Infrastruktur mat sech, an och d'Liewensqualitéit. De Wuesstem muss lues entstoen an der Situatioun vun den eenzele Gemengen ugepasst ginn. Duerfir ass och eng national Planifikatioun wichteg, déi zesumme mat de Gemengen ausgeschafft gëtt.

Op Gemengenniveau ass en ambitiöse Baulückeprogramm néideg: eidel Wunnenge sollen héich besteiert ginn, wann se no enger gewëssener Zäit net méi verlount ginn. Och bei eidelstoenden Terraine mussen d'Propriétaire responsabiliséiert ginn duerch eng entsprecheend Besteuerung.



5. Sport, Kultur an Ëmwelt an der Educatioun wäertschätzen

D'Bildung sollt ëmmer un éischer Stell stoen an net am Laf vun der Zäit nogezu ginn. Während d'Technik an d'Wirtschaft d'Welt ëmmer méi abstrakt erschénge loossen, soll de Besuch zur Realitéit net verluer ginn. Dofir sollen d'Kanner vu Kleng un d'Méiglechkeet kréien, an hirer Schoul méiglechst vill didaktesche Kontakt mat der Natur ze hunn. All Schoul kéint zum Beispill iwwert en eegene Gaart verfügen, wou de SchülerInnen d'Bezéiungen tësche Mënsch an Ëmwelt erkläert ginn.

SchülerInnen sollen an alle Bildungsrichtungen fräien Zougang zu Uebst hunn. Schoulen a Kantine sollten haaptsächlech Iessen aus der Region ubidden, net nëmme well dat schlussendlech och méi ëmweltfrëndlech ass, mee och well et de lokalen Handel fërdert. Et muss och séchergestallt ginn, dass d'Fleesch aus enger fairer Déierenhaltung kënnt.

Bildung a Sport mussen méi verbonne ginn. An der Schoul sollt eng gesond Liewensweis vermëttelt ginn. An deem Sënn soll en nationale „Schoulsportdag“ realiséiert ginn, wou sech d'SchülerInnen kompetitiv vis-à-vis vun anere Schoulen am Land bewiese kënnen, mee gläichzäiteg verschidde Sportarten ausprobéiere kënnen. An deem Zesammenhank léisst sech och en lokale Schoulsportdag organiséieren, wou och d'Grondschoule géinteneen untriede kënnen. Iwwert dese Wee géif net nëmme d'Veerschiedenheet vun de Sportarten vermëttelt ginn, mee och den Teamgeescht, d'Fairness an d'Solidaritéit gefuerdert ginn, well do Kanner a Jugendlecher mat deene verschiddensten Originnen openeentreffen a matenee spillen.

Jugendlechen an all Gemeng sollt et méiglech sinn, sech an alle Formen matzedeelen. Engersäits géllt et, der Jugend eng Stëmm ze verschafen an anerersäits awer och, en oppent Ouer prett zu hunn. An deem Zesammenhank sollten an all Gemeng Raim zur Verfügung stoen, wou déi jonk Kënschtler hier Wierker ausstellen, hier Iddie matzedeelen an hire Suerge Gehéier verschafe kënnen.



6. Lokal a regional Konzepter fir eis Gemengen

Lokal a regional Produkter sollte méi gefuerdert ginn, awer och de lokale Commerce muss ënnerstëtzt ginn. All nei ugemellte Bierger an enger Gemeng soll an deem Kontext e Wëllkommensbong kréien, mat deem hie fir e bestëmmte Betrag an de lokale Geschäfte akäfe kann.

Tëschent lokale Geschäftsleit an der Gemeindeverwaltung muss eng enk Zesummenaarbecht garantéiert ginn, domat d'Stadbild erhale bleift. Dozou gehéieren och charakteristesche Geschäfte mat regionale Produkter. An deem Sënn sollt och all Gemeng sollt iwwert eng Mindestunzuel un Klengbetriber a Geschäfte mat Regionalprodukter verfüegen, fir sou dem Ëmstand vun der Globaliséierung Stand ze halen an esou Aarbechtsplazen ze schafen. Dobäi soll och séchergestallt ginn, dass d'Produktioun, z.B. an der Agrikultur, nohalteg ass, an net d'Resultat vu Monokulturen ass, wéi et ze oft vu multinationalen Entreprisë gemaach gëtt. Als JSL fuerdere mer och, dass d'Gemenge reegelméisseg Mäert organiséieren, wou nëmmen Händler aus der Regioun hir Wueren ubidden.

Waasser ass e Grondrecht. Duerfir sollt et all Bierger vun der Gemeng méiglech sinn, fräien Zougang zu Dréckwaasser ze hunn. Virun allem am Summer an op besonnesch waarmen Deeg sollten dofir Waasserstatiounen am Zentrum bereet stoen.

7. Fir eng Gemeng, déi verständlech an transparent ass

Fir déi Jonk Sozialiste féiert eng méi transparent a kohärent Kommunikatiounspolitik zu enger besserer Biergerbedeelegung a méi Versteesdemech tëschent den Awunner an de Gemengeresponsabelen.

D'Iwwerdroen vun de Gemengerotssëtzunge, grad wéi den "SMS To Citizen Tool" verbesseren d'Kommunikatioun a missten konsequent vun allen Gemengen ëmgesat ginn. Des weideren misst en Informatiounspackage iwwer d'Gemeng fir all nei Awunner zu Verfügung stoen, grad souwéi d'Organisatioun vun Wëllkomensowender wou d'Awunner d'Gemeng an seng Veräiner kenne leiere kënnen.

D'Plattform macommune.lu misst besser fir den Austausch vu "best Practices" tëschent de gemengen ausgenotzt ginn. Esou géif och um nationalen Niveau eng besser Koordinatioun stattfannen.



8. Zesummeliewen an eiser Gemeng

Iwwer 46% vun der Bevëlkerung huet eng net-lëtzebuergesch Nationalitéit: eng eemoleg Situatioun an der Welt. Eng gerecht an oppen Integratiounspolitik fir jiddereen ass vun immenser Wichtigkeet fir d'Zesummeliewen. D'Jongsozialiste striewen e Mateneen un, dat vun Toleranz, Solidaritéit a géigesäitegem Respekt geprägt ass.Ënnerscheeder dierfen net zu Géigesätz ginn

Eng aktiv Bedeelegung um aldeegleche Liewe vun de Gemenge muss weider gefërdert ginn. Dëst kann iwwer de Wee vu lokale Veräiner realiséiert gi, souwéi duerch eng Weiderentwécklung vun den ziville Feieren an Duerffester an duerch d'Promotioun vun de "interkulturellen Treffen". Nieft de Subside solle Veräiner bei der Organisatioun vun de Festivitéite méi ënnerstëtzt ginn. Déi néideg Infrastrukture mussen hire Besoinen entsprechen.

D'Capacitéite fir bezuelbar Sproochcourse mussen an all Gemeng geschafe ginn, mat enger garantéierter Offer vun den dräi offizielle Sproochen. Gemengen sollten eng gewëssen Unzuel vu Poste fir net-Lëtzebuergesch reservéieren. Austauschprogrammer am Ausland a spezifesch an de Regiounen aus deenen hier auslännesch Matbierger hierkomme sollen ënnerstëtzt ginn.

Leit mat speziell Bedierfnisser däerfen net benodeelegt ginn. Den Accès zu öffentlechen Aariichtunge muss fir Matbierger mat ageschränkter Mobilitéit garantéiert sinn. Trottoiren, Parken a Spadséierweeër mussen un hire Besoinen ugepasst sinn. Et solle méi Efforte gemaach ginn, fir Leit mat Behënnerung anzustellen an ze encadréieren, an e reegelméisseg Suivi ze assuréieren, dass d'Regelen an d'Quote respektéiert ginn.

Flüchtlingspolitik ass och Gemengepolitik. D'Gemenge mussen Wunnenge fir d'Flüchtlingen zu Verfügung stellen an esou gläichzäiteg och dem Staat Hëllef fir eng méi efficace Flüchtlingspolitik ze assuréieren. Nieft Sproochcourse kënnen zesumme mat lokale Veräiner d'Altersheim an Anerer d'Aarbechtsplaze geschafe ginn an eng méi schnell an efficace Integratioun garantéiert ginn.

Leit mat finanziell Schwieeregkeeten a mat engem nidderegem Akommes däerfen net ausgeschloss sinn. Nieft finanziell Hëllef misst och eng Unzuel vun den Entréestickete fir lokal Concerten, Muséeën, a Kino fir Famille gratis zu Verfügung ubidden. Fir Matbierger mat nidderegem Akommes solle Sproochcourse gratis zu Verfügung stoen.

An dese fir d'Demokratie schwieerege Zäiten ass en reegelméisseg Austausch tëschen de Generatiounen an de Gemenge wichteg a sollt reegelméisseg stattfannen. Den Austausch tëschen de Senioren a Jonke muss deementspreechend méi gefërdert ginn. Dofir fuerdere mer d'Schafe vun enger "Commission communale intergénérationnelle".



D'Sécherheet vun de Bierger ass wichteg. Mier wëllen awer net eng Sécherheet, déi geziilt bestëmmte Minoritéiten oder Bevëlkerungsgruppe soll schikanéieren. D'Police soll fir all Bierger do sinn, muss awer och op Problemer wéi „racial profiling“ sensibiliséiert ginn. Drogepräventioun an de Kampf géint Drogemëssbrauch ass wichteg fir géint Kriminalitéit virzegoen. An Noperschafte kënnen sech d'Bierger zesummendi fir op een an deen aneren opzepassen, wa méiglech och mat fréieren Uerdnungskräften als Uspriechpartner. Wa gréisser Problemer bestinn, kann doduerch d'Gemeng informéiert ginn.

9. Gesond an eiser Gemeng

D'Jongsozialiste setzen sech dofir an, dass de Gesondheetssystem op kommunalem Niveau ausgebaut a verbessert gëtt.

All Bierger am Land soll d'Chance hunn, en onkomplizéierten a séieren Zougrëff op medezinesch Ënnerstëtzung ze hunn, ouni mussen op d'Noutdëngschter zréck ze gräifen. Och wa mir d'Iddi vun de “Maisons médicales” begréissen, esou muss déi Offer awer dréngend erweidert ginn; et ginn aktuell nëmmen dräi maisons médicales am Land, an dat och just bei de Spideeler.

Eng Gemeng soll hire Bierger d' Méiglechkeet gi schonn op lokalem Niveau kënnen en Dokter ze gesinn, dat och ausserhalb vun de Büroszäiten, dëst mat engem verbesserten ÄBD (“Ärztlicher Bereitschaftsdienst”) oder, wann d'Situatioun et erfuerdert, mat kommunalen oder regionale “Centres médicales”. Konkret stelle mir eis dorënner Gebaier fir, an deenen d'Bierger an hirer Gemeng en Zesummeschluss vun diversen Dokteren an Apdikte fanne kënnen. Dat wier eng dezentral Verdeelung vun de gesondheetstechnesche Mesuren iwwert d'Land an d'Gemengen, a géif och deene Matbierger hëllef, déi manner mobil sinn.

D'Schafe vu “Centres médicales” géif net just d'Waardezäite fir all Mënsch an de Klinike reduzéiere, well op déi dräi Urgencen am Land nach just bei richtegen Noutfäll misst zréckgegraff ginn, mä et géing doriwwer eraus och d'Personal vun de Kliniken an de Rettungsdëngschter entlaaschten, wat am Noutfall Liewe rette kann. Dëst géing awer och mat sech bréngen, datt d'Awunner vu manner zentrale Gemenge keng sou wäit Weeër méi mussen op sech huelen, wa si en Dokter brauchen.



10. Eis Gemengen an Europa

D'JSL well déi europäesch Bindung tëschent de Jugendlechen a Schüler promovéieren. Dobäi sollen an Zukunft bestoend Austauschprogrammer gestärkt an nei Austauschprogrammer a Gemengen a Schoulen, déi nach keng hunn, etabléiert ginn. Ähnlech wéi beim Erasmus-Stipendium fir Studenten ass den Openthalt am Ausland dobäi zäitlech begrenzt a gëtt vun de Gemenge bzw. Schoulen déi participéiere subventionéiert. Een Austausch kann dobäi vun enger Einzelpersoun wei och vu ganze Klassen ugefrot ginn.

Austauschprogrammer wei déi heiten, bidden eng Verdéiwung a Verbesserung vun de Sproochekenntnisse. Dëst geschitt duerch den aktiven a regelméissege Gebrauch vun der Friemsprooch. Zousätzlech bitt den Openthalt an enger Gaaschtfamill d'Méiglechkeet eng aner Kultur kennenzelieren. Domadder gëtt den interkulturellen, europäeschen Dialog gestärkt esou wéi den Erfahrungshorizont vun de Schüler déi deelhuelen, erweidert.

Eng méi enk Zesummenaarbecht mat Gemengen an der grenziwwergräifend europäescher Groussregioun oder doriwwer eraus géif et de Veräiner vun de Gemengen déi deelhuelen erméiglechen zesumme Projeten organiséieren ze kennen. Denkbar wieren hei beispillsweis grenziwwerschreidend Concerte vu Museksschoulen oder Turnéiere vu Sportsveräiner.

Mir liewen an enger Zäit an där d'Zesummeliewen an den Zesammenhalt mat eisen Nopere wichteg ass. D'Gemengen an hier Bierger presentéieren sech duerch esou eng Zesummenaarbecht weltopen. Och de lokalen Handel an d'Déngschtleeschtunge géife vun esou enger grenziwwerschreidend an interkommunaler Kooperatioun profitéieren.

Der JSL geet et dobäi virun allem d'Zesummenaarbecht tëschent de Gemengen ze stäerken, eng Gemeinschaft ze bilden an doduerch ee gemeinsam europäescht Gefill ze verbreedden an ze festegen.